



(Kachin Language)

**Myusha Mungbawng Hpaji Jaw Kongsi (National Unity Consultative Council-
NUCC) A Hpaw Shabawn Ai Lam, Galaw Nga Ai Magam Bungli Hte Jeng Nna
Ndaw Shabra Ai Lam**

1. 2021 ning February (1) ya hta hpyen dap kaw nna Mungdan daru magam ahkang aya zingla madu la kau ai hpe ninghkap ai shawa ninggun hpungtung ni gaw, hpyen gumshem lai ladat hta n'ga gumshem lai ladat yawng hpe shamyit kau na hte munghpawm federal democrasi gawgap lu na yaw shada ai lam a matu Myusha Mungbawng Hpaji Jaw Kongsi (NUCC) hpe 2021 ning, March shata (8) ya shani hpaw hpang dat sai.

2. NUCC hpe 2020 Ra Lata Poi hta mungchying mung shawa ni myit ra ai hte madi shadaw nna tara shang masat hkrum ai lam (De Jure Legitimacy) hpe hkam la sai Munghpawm Mungbawng Rapdaw Gawng Malai Komiti (CRPH) hte, tinang a uphkang ginra hte uphkang sairu gran da lu nna mung shawa a madi shadaw lam (De Facto Legitimacy) nga ai amyu sha laknak lang rawt malan hpung ni, mungdaw federal unit hte amyu sha hta mahta ai mungbawng wuhpung wuhpawng ni hte Mungdan daru magam ahkang aya hpe zing madu la ai hpe ninghkap ai Mungmasa Pati ni, Nlum ta ladaw rawt malan (spring revolution) a ninggun hpungtung ni rai nga ai hpyen gumshem lailen hpe ninghkap ai Ramma, Amyu Shayi wuhpung ni, bungli galaw masha hpawng chyawm ai hpung ni, mung shawa akyu ara galaw ai wuhpung ni, si mani ladat hte gumshem lai len hpe ninghkap ai ni (CDM), shawa ninggun madun woi-awn komiti (strike committee) ni, amyu bawsang hpan hkum, mung shawa hpan hkum ai wuhpung wuhpawng yawng (28) kaw nna datkasa hte hpaw shabawn da ai.

3. NUCC a magam lit madung ni gaw hpyen gumshem lam hpe ninghkap ai mung shawa yawng hpe gawng malai tai nhtawm federal demokresi lai masa hpe pawnghpawm woi-awn ladat the woi hkrang shapraw lu ai Asuya byin pru wa na

lam, federal demokrasi ga shaka laika hte maren Mungshawa Rapdaw Zuphpawng (People's Assembly) kaw nna lam masan ya ai polisi hte zai ningsang ni hpe lit la hkrang shapraw na lam, Mungshawa Rapdaw Zuphpawng (People's Assembly) langai hte langai a lapran lam masan nna jahkru ya ai lam ni hpe rawt malan aten ladaw laman dingyang yu reng ai lam galaw nga na.

4. NUCC gaw federal demokrasi ga shaka laika daw (1) hte (2) hpe ka lajang nna 2021 ning March shata (31) ya shani hta ndau shabra ai hpang, 2021 ning April shata (16) ya hta Amyusha Myit Hkrum Rapra Asuya (NUG) hpe mung hpaw ninghtan da sai. Dai federal demokrasi ga shaka laika hta mungchying mungshawa yawng a rawt malan ai pan dung hpe grau dan dawng wa lu na matu yaw shada let federal demokrasi ga shaka laika a ntsa masam maram nna bai gram sharai ai lam hpe 2021 ning May shata (24) ya hta hpang lai wa sai rai nna Mung Shawa Rapdaw Zuphpawng hta dawdan shagrin ai lam galaw sa wa na.

5. NUCC gaw hpyen gumshem lailen hte gumshem magam lai len hpe shamyit ai lam hta lawm ai rawt malan dawhpun dawnu kaba ni rai nga ai Amyusha Myit Hkrum Rapra Asuya (NUG), Munghpawm Mungbawng Rapdaw Gawng Malai Komiti (CRPH), gumhpawn jahkrup komiti/komishin ni hpe federal demokrasi ga shaka laika hte maren lam masan yu reng let, rawt malan magam bungli awng dang hkra pawng hpawm woi awn ai ladat hte shakut shaja sa wa ai lam ndau shana dat ga ai.